

# Ess gibt vill Halbkronke

Deletzt habb ich uffem Axthelm-Parkplatz de Schorsch in soim Audo sitze seh, er hotts Flerschemer Blättche gelese unn iss e bisje erschrocke, wie ich emm onns Fenster gekloppt habb. Er hott die Zeidung eweckgelegt, ess Fenster erunner gemacht unn Gude gesacht.

No, habb ich gefroocht, Schorsch, was gibts Neies in Flerschem?

Och, hott de Schorsch gesacht, ich habb grad dess iwwer die Umgehungsstrooß gelese, die Unnerlaache werrn jetz ausgeleecht, unn ich will emol hie in die Erzberjer Strooß unn will merr die oogucke.

Mach dess, saach ich, awwer warum sitzde dann hier erum?

Ei, gibt de Schorsch zur Antwort, ich wart uffs Kättche, die iss beim Scharfebaum, dann kimmt se her unn mir zwaa gehe dann zum Schlecker, weil sie will Wäschpulver odder so ebbes holle, dess traach ich dann hier ins Audo.

Ich habb genickt. Mach dess, weils Kättche hotts joo ewe aach in de Knoche unn du bist noch gut druff. So muss merrs mache. Guck emol doodriwwe doin Kusseng unn soi Fraa, die makes fast genauso, nur dass bei dene die Fraa dess Zeich schleppt unn de Monn hickelt. Doodeferr fährt der dann Audo. Merr muss sich helfe in unserne John.

Waaßde, moont de Schorsch, wenn ich dess monchmol lese due mett dene Oikaafsgeleechenheite in Flerschem. Die oone saache, die solle „fußläufig“ soi. Unn die onnern reeche sich uff, weil zuvill mettem Audo unn zuwenich mettem Fahrrad gefahrn det werrn. Die vergesse all uns Ältere zwische sechzich unn achtzich, unn von uns gibts in gonz Flerschem fast 3800 Leit, stell derr dess emol vor! Awwer unser Johrgäng kenne nimmi iwwerall hielaafe, vor allem kenne merr die schwere Dutte nimmi hoomtraache, unn deshalb isses uns eichtlich egal, wo die Geschäfte sinn. Mir fahrn mettem Audo hie, kaafe oi unn fahrn unsern Krempel hoom. Ob merr dann nooch Raunem, nooch Hochem, in die Dalbergstrooß odder uffs Böder-Gelände fahrn iss eichtlich egal. Mir fahrn dorthie, wos Oogebot stimmt, wo merr unser Zeich oikaafe kenne unn wo Parkplätz sinn.

In dem Aacheblick kimmts Kättche, gibt emm Schorsch ihr Dutt, der leechtse uff de Rücksitz unn klettert aussem Audo.

No ihr zwaa, von was habt ihr dann gebabbelt, frächts Kättche.

Ich sach: Ei doodefoo, dass in unserne John meisdens ooner nimmi so kann unn de onner noch gut druff iss.

Dess Kättche lacht. Ihr moont die Halbkronke. Host Recht, von dene gibts immer mehr.

De Schorsch hott de Kopp geschittel. Halbkronke? Ei wieso dann Halbkronke?

Sachts Kättche: Ei weil von so emm Pärche ooner kronk unn de onner noch gesund iss.

Awwer so long merr beisomme bleibt, mächt dess nix.

Doo frächt de Schorsch: Kättche, was desten mache, wenn mir was bassiern det? Du konnst nit Audo fahrn unn laafe konnsde aach nimmi so gut.

Dess Kättche grinst. Ei ich det merr ooner suche, der mich noch irchentwo hiefahrn kennt. No ja, dem misst ich halt ab unn zu mol enn Gefalle due, awwer dess det merr aach nix ausmache.

De Schorsch hott bees geguckt: Enn Gefalle due? Was dann ferrn Gefalle?

Grinst dess Kättche noch mehr. Nit was du widder denkst, awwer warum eichtlich nit?

Awwer ich habb eher on e gut Esse mett Bratkaddoffele gedenkt. Eiern Honnes